

**KWS Shillong leh Guwahati**  
**Pathen houkhomna kingon**  
**30<sup>th</sup> Oct'16, 1 pm.**

KWS Shillong le Guwahati Pathen thu le laa a kiloikhomna kingon lolhing tah in nisim 30<sup>th</sup> Oct'16 nikhon ana kimang chai tai. Kumbul til a pat'a hitia phat mankhom ding hi Shillong lamkai ho lungtup ana hijing in, ahinla, phat kijen pet aum theilou jehin ana kikhongai in ahi. Shillong a kon hung kalsong member 110 -120 lah hiding in ginchat ahi. KWS Guwahati houin touna mi 380+ ding'a kigol chu adimset jeng in ahi.

Jingkah an nelouva Shillong ho hung kalsong ahijeh un KWS Guwahati in nehle chah angaiton ahi. Neh le chah sem a pang Six Mile prayer cell ho a fel mama uvin, Shillong ho hung lhun kah in, thil jouse kitup sel'in gontup san ana kou uvin ahi.

Nidan 1 pm/cn ahi phat in, Pathen vahchoila'n KWSG praise & worship team hon eina lamkai uvin, mipi lhagaovin ahal l'eh e. Chujouvin, kingon sung'a vaihom toh ding Pa Ngamkholen, Secretary, KWS Shillong in phat ho aban ban in ahin tol lhan ahi.

Pa Thongkholet, Chairman KWSG in Shillong member holeh maljin ho lemna thu aseiyin ahi. Aman liemna thu aseina a hitobang'a kingon Shillong lamkai hon akhohsah uva, athu keo hilouva, toh molsa a aumthei jeh in pahchatna sangtah apen ahi. Guwahati hon tua hi tha kabat u ahi tan, tukum chulah phat akichin beh jeh in khovei langleh tha hungsah tei ding hin ngaito uving'e jong ati.

Ng. Chachan, KWS Shillong in Pathen vahchoila ngeitah in asan, Pathen thangvah aum'e.

Pa Paoboi, Chairman, KWS Shillong in jong phonding'a khoh ho hetsah nale kipathu sein phat ana mang'e. Hitobang kingon hi Shillong Nute lungel jal'a hung kondoh ahi thu jong aseiyi. KWS Shillong vision 2025 leaflet jong mipihon akilah cheh theidiuvin hetsahna aneiyi. Guwahati ana umlaiya Rev M Haokhothong le Rev J Mang toh amaho thum lamkai na a tua KWSG houin khom kiput masapen concrete ana l'eh u thusim chomcha jong aseiyin ahi. Chujouvin, Shillong akon lamkai hung kalsong cheng KWS Executive, Kuki Inpi Meghalaya, KWA Shillong, KSO Shillong adang dang ho mipi mu thei din phongdohna anei ye.

Lamkai dangho vaihomtoh in aphonhdoh kit in ahi.

KWS Shillong Choir hon Pathen vahchoila ngeitah ni asa jom un, mipi lung achoh thou l'eh in ahi. Hiche sung'a hin tolom laikhomna aum in, tolom ho Pathen heng'a lhandohna Rev M Haokhothong in amang'e.

Pastor Seiminthang, Pastor KWS Shillong in Philemon lekhabu a pansan "Christa jal'a Pathen toh kicham ihi tauve" thupi mangchan Pathen thua tilkhouna aneiyin ahi. Philemon lekhabu hi Bible sung'a holdoh hahsa nasah mai thei u ahi, Titus leh Hebrew kikah a kimu ahi. Holdoh hahsa jeng jongle hin holdoh utin vekhom ute. Philemon akisut na phat hiche mong ahi ti koiman aseipon ahi. Ahin, alhangpia mi atamjo nopna chu AD 61 le AD 63 sung'a kijih hiding in ginchat ahi. Philemon lekhabu hi kojijih ahi akichet tah in het thei ahi (v.19). Lekhabu dang bangin kinelna aum poi. Rome a songkul a athot ahi jeh in Prison epistle tin jong akihe in ahi. Prison epistle tia kihe ho chu Ephesians, Philippians, Colossians leh Philemon ahi.

Philemon lekhabu isim teng mithum akilang jin ahi. Amaho chu Philemon, Onesimus leh Paul hi ahi.

1. Philemon hi Colosia houbung mi ahin, Christa tahsan ho ngailutna nei mi ahi akimu thei ye (v 5-7). Paul hi Philemon jeh a kitilkhon ahi. Solchah ho hebol le khoto mi ahi akilang'e. Eiho lah a vang- mi kipelna thei, mi kusuhmo nathei bol ngan; mi lunghan nathei seiodoh, mi lhadahna theiya chon kitam ahi. Philemon hi mihaotah hiding in jong ginchat ahi. Ajehchu soh aneiyin ahi. Amaho kahanglaiya mihao in bou soh avuljou ahi.
2. Onesimus hi Philemon sohpa ahi. Thil aguh jeh in apupa kom'a kon in ajamdoh tan ahi. Ama hin huhhingna Paul a kon ana chang in geldan khat aum'e. Ahin, songkul sung'a kon'a Paul a kon'a huhhingna chang hiding'in Bible a muchet ahi (v 10).

3. Paul hin Philemon kom'a Onesimus in nadeilou lamtah in ana chon in mipha chomlou anahi tajongle ngaidam tan. Nachunga suh khel anei ham, bat anei ham ahi-jongle, hijong chu kei (Paul) chung a del din sim jengin tin ngehna anei ye. Ajeh chu Onesimus hi soh mai mai ahitapon, kei din soh sanga chung-nungjo sopi deitah ahin, nang din vang Pakai jal le tahsa jal'a hahideh ahiye (v16).

Achung'a mithum ho ivet teng mudoh thei chu.

- Philemon hi Pathen dinmun a ding,
- Paul hi Christa panmun a um chuleh
- Onesimus hi nangle kei, michonse dinmun a ding a lah thei ahi.

Adam chonset jeh in vannoi chonset nan alha tan, Jesu Christa vang'in koi hileh atahsan chan chu huhhinga um thei kit ahi tai.

Rom 5:12 Mihem khat jeh a vannoiya chonset hung lut'a chonset jeh a thina hung lut, hitia chu mitin achonset jeh a mihem jouse chung a thina hung lhung kha ahi.

Rom 3:23 ajeh chu mihem jouse chonse Pathen loupina changlel ahitauve;

Rom 5:1 Tahsan jal'a them chang ihi-phet'un i-Pakaiyu Jesu Christa vanga Pathen to kicham ihitauvin.

Pathen thua tilkhouna phat kichaiyin Ng Sarah, Ng Jolly, Gl Totong chuleh Gl Gogou in KWSG khanglai thalheng in Pathen vahchoi la ngeitah asauvin ahi.

Pa Haopu, Secretary, KWSG in hetsah ding'a lomho phondohna ana neiy e. Shillong le Guwahati kigom ahi jeh in Guwahati in achepi phabep ho 1<sup>st</sup> Sunday-Missionary Sunday chuleh Birthday blessing prayer, 2<sup>nd</sup> Sunday-Youth Sunday, last Sunday-wedding anniversary blessing prayer, 5<sup>th</sup> Sunday aum teng sacrament service kiman dan ho aseiy e. Tuni nikho jong sacrament service umding'a kingon um ahin, ahinlah phat akilem tahlou jeh a ibol lou diuva um ahi tai. Chujouvin, Pa DP Haokip, Adviser, AIKWSCC in thuthoh anei, Khanglai 2017 October a jao ding jousen ahi thei chan na Bible khatvei beh simjou tei ding ati chu avel in hetsahna leh temna anei in ahi.

KWS Shillong ten 2025 leh 50<sup>th</sup> anniversary naman diu ahi tah leh tua hi 41 years naphat diu ahi tan, Guwahati te vang 17<sup>th</sup> Nov leh 19<sup>th</sup> years bou kahi nalai diu ahin, eiho khankho dol'a mi upan anaote ahungvil hi adoltah ahi in, tha kisahih jongle khohlou didan in aum thim'e.

October lhasung'a ana kichengho ding'[a lungmon umtah vang thumpenhna Rev Dr HD Angam in ana neiyin ahi.

Ng. Rebecca Haokip le aloihon jong Pathen vahchoila ngeitah music lhingset in ana saove.

Thuphon phat in Pa Dr DL Haokip, President, KWA Guwahati in jong Shillong a kon hungkalsong ho jouse leh Kuki Inpi/KWA/ KSO lamkai ho kom'a ahung lhung ding 14<sup>th</sup> Nov leh Gauhati University auditorium hall koiman aman kahlou lai, mi sangkhat val kikhopna thei mun a Guwahati Chavang KUT 2016 kingon kibol di ahin, nabon chauva nahungsoh kei kit diu ahi tin temna aneiy e.

KWS Shillong Choir hon Pathen vahchoila asah jouvun Pr Akhai, Pastor KWSG in Pathen heng'a thangvah naleh Shillong member ho dam a alhun nathei diuvin taona amang'in, kingon akichai tai.

\*\*\*

*KWS Guwahati member ho akon thu lhut kimu chu, thu le la anom in kimanchah anom lheh e. Vaihomtoh pan jong phat atoldan ho anom in phatche lam anakihapon ahi. Sermon jong akicheh in ngainom aum'e. KWS Shillong Choir ho lasah ho angei thei in nasatah in mijousen apahchan ahi. Guwahati ajong Choir phudoh loi thei nading lampi vetpan din mipi tamjo lungtup ahi tai. Alang khat a Shillong hon KWSG Praise & Worsdhip team hon Pathen vahchoi la a eilamkai u anom lheh e ati uvin ahi. Guwahati a Music le sound system aning lhing'e ti thulhuh akimui.*

*Achainan, alang-lang'a aphachom ding mudohna le thil thah hetbe na-a pang kingon ahi tah jeh in, Pathen loupina choisang'in um ta hen.*



Fig.1 Praise & Worship team hon mipi vahchoi la alam kai pet uh.



Fig.2.1 Pa Ngamkholen, Secretary KWS-S Vaihomtoh



Fig.2.2 Pa Thongkholet, Chairman KWS-G liemna thu aseipet



Fig.3.1 Pa Paoboi, Chairman KWS-S thuphon pet



Fig.3.2 Rev M Haokhothong, tolom lhandoh





Fig.4.1 Pr Seiminthang, Sermon



Fig.4.2 Pa Haopu, Secretary, KWS-G thuphon



Fig.5.1 Rev Dr HD Angam, anniversary blessing prayer



Fig.5.2 Six Mile prayer cell buhon ho



Fig.6. KWS Shillong Choir members